

INUIT ATAQATIGIIT

Inatsisartuni



UPA 2019/169
2. april 2019
Sofia Geisler

Attartortitsisup aningaasartuutit ilanngaatigereerlugit iluanaarutissaasa maanna 1,5%-iusut, Namminersorlutillu Oqartussani inissianik attartortut akilertagaasa ukiut pingasut ingerlaneranni atorunnaarsikkiartuaarneqarnissaannut, taarsiullugulu immikkut aserfallatsaaliinissanut atugassiissutitut inissiaqarfiit immikkoortortaanniiginnarnissaannut Naalackersuisut siunnersuummik suliaqaqqullugit peqquneqarnissaannik siunnersuut. Aserfallatsaaliinissami aningaasat oqorsaait pitsanngorsarnerinut, matunut, igalaanut, qalipannernut assigisaannullu atorneqassapput.

(Inatsisartuni ilaasortaq Aqqaluaq B. Egede, Inuit Ataqatigiit)

§37 naapertorlugu apeqqutinnut 2018/328-imut akissuteqanerminni Naalackersuisut allapput inissiat attartortittakkat oqummik eqqugaasimasut siornatigut oqoqarsimanersut INI A/S-imi immikkut nalunaarsorneqarneq ajortoq. Tassa imaappoq ilisimaneqanngilaq oquk qanoq ajornartorsiutaatiginersoq. Taassuma saniatigut inissiat attartortittakkat nutaanngilisut iluarsaatassanngorsimasullu aserfallatsaalineqarnissaannut 6 aamma 18 milliarder kronit akornanniittut atorfissaqartinneqartut ukiariaq tusagassiuutitigut atuarsinnaavarput.

Inissiat ikittuunngitsut aserfallatsaalisassaapput, ullullu tamaasa ajorsartussapput iliuuseqajaartoqanngippat.

Aningaasartuutit ilanngaatigereerlugit attartortitsisup iluanaarutissaasa maanna 1,5%-iusut atorunnaarsikkiartortinnissaat illuatungaanilu aserfallatsaaliinissamut atugassiissutit inissiaqarfiit immikkoortortaanniiginnarnissaannut alloriarnissamut siunnersuut Inuit Ataqatigiinniit tapersorsorparput.

Taamaaliorpugut pissutigalugu naliliisinnaanerput naapertorlugu inissiat aserfallakkiartuinnassanngippata periuseq atorneqartoq allanngortittariaqaleramat. Qulakkiigassarpullu tassaavoq inissiaqarfiit immikkoortortaanni aserfallatsaaliinissamut suliassap isumaginissaannut qulakkeerinninnissamut sulisunik naapertuuttumik suliatigut kivitsisinnaasunik peqarnissaa.

Aqqaluaq B Egedep siunnersuutaata ataatsimiititaliamut attuumassuteqartumut ingerlateqqinnissaa innersuussutigalugu taperserparput.